



Centru Formasaun Polísia Orienta ba Filozofia Polísiamentu Komunitária?

Mahein Nia Nú. 97, 26 Fevereiru 2015



Foto: PNTL

Relatoriu Fundasaun Mahein Nia Lian ne'e suporta husi povu Amerikanu liu husi Ajénsia Estados Unidus ba Dezenvolvimentu Internasional (USAID) no Embaxada Finlandia iha Jakarta.

Vizaun husi autor sira ne'ebé expresa iha públikasaun relatoriu sira ne'e la representa vizaun husi Ajénsia Estados Unidus ba Dezenvolvimentu Internasional (USAID) no Embaxada Finlandia.



Website: www.fundasaunmahein.org



Kontiudu sira

Kontiudu sira	2
Introdusaun	3
Metodolojia	4
Istoria no lalaok formasaun PNTL	4
Se maka hala'o polisiamentu komunitaria?	7
Rekomendasaun	10
Bibliografia	11



Introdusaun

Tuir estratéjia no filozofia polisiamentu nian PNTL iha karakterístika polísia komunitária, maski nia organizasaun, dixiplina, instrusaun no estatutu pesoál nian sei tuir natureza militar, PNTL sei la konstitui forsa natureza militar ida.¹

Hatur vizaun no misaun prinsipal ida iha Planu Estratejiku PNTL tinan 2014 – 2018. Sei atinji padraun ne'ebé aas kona-bá siguransa no tranquilidade pública iha Estadu Timor-Leste. Ho misaun prinsipal ida defende direitu no liberdade sidadaun nian iha Estadu Demokratiku Timor-Leste, hodi hametin no haburas mandatu Konstituisaun Repúblika nian.²

Nune'e ho prinsipiun ida katak konfiansa aas husi Estadu, Governu no comunidade. Planu Estratejiku PNTL nian difine mos modelu polisiamentu ne'ebé PNTL adopta mak VIP (Vizibilidade, Involvimentu no Profesionalismu). VIP ho nia sentidu katak vizibilidade aas polisia nian halo katak comunidade sente seguru. Ho involvimentu comunidade nian halo comunidade sente katak sira hola parte. Ho atuasaun sira ne'ebé iha hatan ho profesionalismu hodi nune'e serbisu polisia nian satisfaz comunidade.³

Tanba ne'e PNTL adopta modelu polisiamentu hakoak filozofia polisiamentu komunitaria nian liu husi adopta doutrina VIP. Ho nune'e filozofia polisiamentu komunitaria aplika ba membru hotu-hotu iha PNTL nia laran. Polisiamentu komunitaria la refere deit ba departamentu ka seksaun espesifiku ida iha PNTL, maibe refere ba aprosimasaun ne'ebé PNTL iha ba serbisu iha instituisaun nia laran no entre PNTL ho comunidade.⁴

Filozofia ida ne'e sai ba buat konkretu ida iha serbisu polisiamentu nian. Papel importante ida husi Centro Formação Polísia (CFP) maka eskola PNTL nian ne'ebé iha kapasidade espesial hodi fó formasaun moral, kultural, física no tékniku-profisionál ba ofisiál, Sarjentu no ajente sira, no mós hodi atualiza, espesializa no fó valór ba sira nia kuiñesimentu.⁵

Atu realiza programa instrusaun ba serbisu espesializadu Departamentu Polisiamentu Komunitaria Nasional hola papel importante ida mos tuir Lei Organika PNTL nian haruka. Iha ne'ebé ho misaun espesifika tuir kolaborasaun ho CFP nian, defini nesesidade no programa instrusaun ba serbisu espesializadu polísia nian.⁶

Ho nune'e, relatoriu ne'e nia objetivu hare kona-bá lalaok formasaun sira iha PNTL nia laran iha ne'ebé orienta ba filozofia polisiamentu komunitaria nian. Pontu prinsipal seluk ko'alia kona-bá

¹ Dekretu -Lei n. ° 09/2009, Loron 18 fulan Feveiru. LEI ORGANIKA POLÍCIA NASIONAL TIMOR-LESTE (PNTL). Artigu 1), número 2).

² Planu Estratejiku PNTL tinan 2014 – 2018.

³ Planu Estratejiku PNTL tinan 2014 – 2018 kona-bá modelu Polisiamentu PNTL nian maka VIP.

⁴ Planu Estratejiku PNTL tinan 2014 – 2018.

⁵ Dekretu -Lei n. ° 09/2009, Loron 18 fulan Feveiru. LEI ORGANIKA POLÍCIA NASIONAL TIMOR-LESTE (PNTL). Artigu 39), número 1).

⁶ Dekretu -Lei n. ° 09/2009, Loron 18 fulan Feveiru. LEI ORGANIKA POLÍCIA NASIONAL TIMOR-LESTE (PNTL). Artigu 18), alinea a).



se maka hala'o polisiamentu komunitariu no ikus liu preokupasaun sira kona-bá aprosimasaun no atuasaun PNTL nian.

Metodolojia

Metodolojia ne'ebé adopta iha relatoriu ida ne'e liu husi rekolla informasaun no literatura sira ne'ebé pública dahuluk ona husi ONG nasional, intenasional no media sira. Nune'e mos dokumentu ofisial sira iha portal Governu nian no mos rezumu husi relatoriu Fundasaun Mahein (FM) ne'ebé pública ona tinan 2014 inklui entrevista pesoal sira. Konklui relatoriu ida ne'e ho diskusaun interna iha nivel ekipa peskizador sira ho modelu *Security Sector Discussion* – SSD.

Istoria no lalaok formasaun PNTL

1. Istoria formasaun PNTL

Istoria kona-bá formasaun ka treinamentu ba ofisias, sarjentu no ajente PNTL sira hahu kedas inisiu PNTL estabesele iha fulan Marsu tinan 2000. Momentu ne'eba iha misaun *Organizasoins Nasaoins Unidus (ONU)* husi *United Nations Tranzitional Administration in East Timor (UNTAET)* nia responsabilidade. Primeiru rekrutamentu ba ema na'in lima-nolu. Polisia Sivil ONU nian ka *Civilian Police (CIVPOL)* maka halo rekruta no mos selesaun ba kandidatu polisia sira iha Dili no mos iha distritu tomak.⁷ Rekrutamentu ne'ebé kria kombinasan entre polisia ne'ebé laiha esperiensa no lidera husi maioria eis polisia Indonezia ne'ebé maka priense nivel mediu no superior. Ikus halo ema hotu preokupa no sosiedade sivil sira protesta maka'as.⁸

Hafoin ida ne'e harii tiha Akademia Polisia iha Dili no CIVPOL hahu treinu ba rekrutadu sira hamutuk ema 1,700 no kursu formasaun baziku durante fulan tolu. Iha tempu hanesan, eis-polisia Indonezia nia hamutuk ema na'in 370 tama iha forsa foun polisia nian liu husi kursu intensivu durante semana haat.⁹ Obstaklu sira iha formasaun momentu ne'eba maka treinamentu ho tempu ne'ebé limitadu no mos ofisial sira husi UNPOL fo treinamentu ho lingua Ingles. Kadete sira hetan deit treinamentu fulan tolu, depois semana haat ba kursu baziku no gradua sai ajente PNTL.¹⁰

Iha ne'ebé kualidade no efikasias husi formasaun hirak ne'e nota katak la adekuaudu tebes tanba falta palnu no kompetensias husi CIVPOL durante tinan hirak inisiu.¹¹ Nune'e mos ofisial

⁷ Fundasaun Mahein (2010) Rekrutamentu ba PNTL: Dalan Naruk ba Profesionalizmu. Disponivel iha: <http://www.fundasaunmahein.org/2010/12/14/mahein-nia-lian-no-14-komunikadu-da-imprenzarekrutamentu-ba-pntl-dalan-naruk-ba-profesionalizmu/>. Asesu iha laron 12 fulan Fevereiru tinan 2015.

⁸ Lao Hamutuk Bulletin Volume 4, No. 2: Maiu 2003.

⁹ Wassel, Todd (2014). Relatoriu TAF, Instituisionaliza Polisiamentu Komunitária iha Timor-Leste.

¹⁰ Fundasaun Mahein (2010) Rekrutamentu ba PNTL: Dalan Naruk ba Profesionalizmu. Disponivel iha: <http://www.fundasaunmahein.org/2010/12/14/mahein-nia-lian-no-14-komunikadu-da-imprenzarekrutamentu-ba-pntl-dalan-naruk-ba-profesionalizmu/>. Asesu iha laron 10 fulan Fevereiru tinan 2015.

¹¹ Wassel, Todd (2014). Relatoriu TAF, Instituisionaliza Polisiamentu Komunitária iha Timor-Leste.



treinador internacional dala barak la iha esperiensa no kuiñesimentu ida nesesariu no falla dezenvolve kurikulum ida ne'ebé komprensivu.¹²

2. Formasaun polisiamentu komunitaria

Ho Lei Organika PNTL nian pasa iha tinan 2009 Akademia Polisia muda naran ba Centro Formação Polisia (CFP). CFP continua ezerse nia papel hodi fo formasaun ba membru polisia sira tuir Lei Organika PNTL nian artigu 39 nia haruka.

CFP hala'o ona kursu formasaun ba PNTL sira to'o tinan 2015 maizumenus ba dala 35 ona hahu instituisaun PNTL estabese ho total klase 81 inklui tulun husi parseiru dezenvolvimentu sira. Durasaun formasaun ba ajentes rekruta sira durante tinan 1 (ida) ne'ebé kompostu husi fulan 2 (rua) iha Rairobo-Atabae-Bobonaro, fulan 8 iha CFP Dili, no fulan 2 ba hala'o estajiu, hafoin maka graduasaun hodi sai ajente polisia iha Instituisaun PNTL.¹³

Formasaun sira ne'e importante tebes ba kadetes rekrutadu sira iha nivel kuiñesimentu baziku antes rekruta sai ajente polisia. Iha ne'ebé durasaun formasaun ba treinamentu baziku durante tinan ida nia laran. Fulan rua treinamentu iha Rairobo depois treinamentu atu familiariza ho lei no disiplina iha CFP no mos serbisu baziku kona-bá polisia nia. Segundu Komandante Jeral PNTL, Komisariu Polisia Afonso de Jesus hatete treinamentu baziku kona-bá fiziku ne'e atu eduka kadetes foun sira nia mental atu forte, karik aban bainrua iha konfrontasaun ruma, sira bele responde ba situasaun ne'e.¹⁴

Durasaun formasaun ba ajente rekrutadu sira kompara ho formasaun dahuluk liu hahu harii Instituisaun PNTL iha mudansa ida significativu tebes. Mudansa ida lori formasaun ida durante tinan ida hafoin ajente sira ezerse nia funsaun iha comunidade. Ida ne'e prova konkretu ida ne'ebé ita hakarak prepara didiak ajente sira tuir natureza polisiamentu nian ne'ebé PNTL adopta.

Maske nune'e, Provedoria dos Direitos Humanos no Justisa (PDHJ) kooperasaun ho CFP desde tinan 2010 fo formasaun ba ajente foun sira. PDHJ nia papel importante atu fo treinamentu lei no direitos umanus. Obstaklu maka tempu ne'ebé limitadu atu fo treinamentu ba kadetes sira ho informasaun sira kona-bá kna'ar PDHJ, direitos umanus baziku, lei violensia domestika, tortura, politika uza forsa, no prosesu detensaun nian. Rezultadu treinamentu baziku

¹² Fundasaun Mahein (2010. Dezembru. 14) Rekrutamentu ba PNTL: Dalan Naruk ba Profesionalizmu. Mahein Nia Lian Nú.15.pdf. Disponivel iha: <http://www.fundasaunmahein.org/2010/12/14/mahein-nia-lian-no-14-komunikadu-da-imprenzarekrutamentu-ba-pntl-dalan-naruk-ba-profesionalizmu/>. Asesu iha loraon 12 fulan Feveiru tinan 2015.

¹³ Ajente rekruta foun 260 hahu tuir formasaun. Disponivel iha: <http://www.pntl.tl/2015/01/19/ajente-rekruta-foun-260-hahu-tuir-formasaun/>. Asesu iha loraon 17 fulan Feveiru tinan 2015.

¹⁴ Polisia foun tenki tuir treinamentu fiziku. Diponivel iha: <http://www.thediliweekly.com/tl/noticias/seguransadefeza/1144-polisia-foun-tenke-tuir-treinamentu-fiziku>. Asesu iha loraon 20 fulan Janeiru tinan 2015.



ne'ebé PNTL hetan la sufisienti hodi prepara kadetes ho tempu semana ida ne'e konsidera tempu ne'ebé badak liu.¹⁵

Observasaun seluk husi Diretor ONG *Asian Justice and Rights* (AJAR) José Luis Oliveira hateten treinamentu fiziku ne'e tenki naton no formasaun barak liu maka iha kuinesimentu lei, mentalidade atu forma sira nia emosaun ne'e maka presiza barak. La'os kestaun fiziku, ne'e importante maibe fiziku ne'e ita bele rezolve bainhira eziste programa ida ne'ebé regular iha instituisaun hodi dezenvolve treinamentu fiziku, no labele depende ba CFP maka fo treinu. Tanba ne'e presiza difine klaru kurikulum formasaun PNTL husi aspetu kuiñesimentu no mental, ladun orientadu atu forma membru sira sai polisia maibe forma sira sai fali semi miltar.¹⁶

Formasun espesializada sira iha CFP inklui formasaun polisiamentu komunitaria no orientasaun prinsipal ida husi filozofia PNTL nian. Signifika katak elementu PNTL hotu formadu ho komuga doutrina polisiamentu komunitaria nian la hare ba husi unidade, departamentu ka seksaun serbisu sira iha PNTL nia laran.¹⁷

Formasaun polisiamentu komunitaria la'os deit iha nivel baziku nian maibe kontinuasaun ba formasaun sira avansadu nian. Tantu iha CFP no rai liur liu husi parseiru dezenvolvimentu sira. Formasaun avansadu kona-bá kna'ar Oficial Polisia Suku (OPS) hodi vizita tama uma sai uma hodi sosializa lei violénsia doméstika, polisia eskola, kuiñesimentu kona-bá droga, alkóliku nomos oinsa halo investigasaun báziku ba problema ruma ne'ebé akontese iha terrenu.¹⁸

Parseiru importante ida hanesan Polisia Nova Zelandia nian ho nia misaun iha Timor-Leste ho naran *Timor-Leste Community Policing Programme* (TLCPP). Durante ne'e apoiu maka'as ba PNTL hodi serbisu hamutuk ho Departamentu Polisia Komunitaria Nasional (DPKN) no CFP hodi elabora no revizaun ba kurikulum formasaun polisiamentu komunitaria. La'os deit formasaun iha rai laran, ofisial superior sira husi PNTL hala'o mos estudu komparativu iha Nova Zelandia hodi hetan lisaun ruma no bele aplika iha Timor-Leste tuir natureza rai idak-idak nian.¹⁹

Parseiru importante seluk mos hanesan *Japan International Cooperation Agency* (JICA) iha Timor-Leste fornese mos oportuñidade hanesan ba PNTL hodi halo estudu komparativu iha Japaun no Indonezia kona-bá pratika polisiamentu komunitaria. Lisaun importante ida kona-bá

¹⁵ Magno Ximens, Valerio (2014). Diretor Nasional Direitus Umanus PDHJ. Intevista pesoal.

¹⁶ Luis de Oliveira, José. (2015 . Fevereiro). Intevista Pesoal

¹⁷ Intervensaun Sigundu Komandante Jeral PNTL, Komisariu Polisia Afonso de Jesus iha enkontru ho parseiru dezenvolvimentu TLCPP no TAF iha Sekretariadu Estadu Siguransa – SES iha tinan 2014.

¹⁸ Membru OPS 442 tuir treinamentu avansadu. Disponivel iha: <http://www.pntl.tl/2014/09/15/membru-ops-442-tuir-treinamentu-avansadu/>. Asesu iha laron 10 fulan Fevereiro tinan 2015.

¹⁹ Ribeiro, Boavida Superintendente Asistente. (2014) Komandante Departamentu Polisia Komunitaria Nasional. Intevista pesoal.



polisia turismu, PNTL sira aprende husi rai sira ne'ebé hahu dahuluk tiha ona polisiamentu komunitaria.²⁰

Nune'e *The Asia Foundation* (TAF) liu husi programa Hametin Koperasaun Polisia ho Komunitade (HAKOHAK) tulun PNTL harii tiha ona estrutura importante ida husi nivel nasional to'o suku. Objetivu prinsipal ida maka hametin ligasaun polisia ho comunidade. Pratika ne'ebé hatudu involvimentu comunidade nian maka'as. Iha estrutura ida ne'e iha nivel nasional bolu naran Konsellu Dirativa Nasional (KDN), iha nivel distritais Konsellu Dirativa Distritais (KDD) no iha suku bolu naran Konsellu Polisiamentu Komunitaria (KPK). Kompozisaun sira husi estrutura ida ne'e mai husi polisia, lider komunitaria, veteranus, ONG no Igreja inklui ajente Estado sira nian iha nivel distritu no suku.²¹

Ho pratika hirak ne'e no esforsu PNTL nian kona-bá formasaun polisiamentu komunitaria ba elementu hotu-hotu PNTL. Relatoriu Komandu Distrital sira ba Komandu Jeral PNTL reklama katak programa polisiamentu komunitaria komesa redus krime. Portantu Polisiamentu Komunitária loke dalan entre polisia ho comunidade hodi serbisu hamutuk no rezolve problema krime nian. Komandu Baucau hato'o katak atividade prinsipal maka OPS sira iha koordinasaun diak ho xefe suku sira hodi socializa lei trafiku no impaktu husi droga no alkóliku. Kazu hanesan Komandu Liquisa, hato'o, durante programa Polisiamentu Komunitária iha Distritu Liquisa elementu polisia iha kapasidade diak ko'alia ho comunidade sira, liu husi programa polisia ho lider comunidade sira komesa rezolve problema, hanesan problema disputa rai, prevensaun violénsia doméstika no kazu poligamia, kazu barak maka agora la to'o ba tribunal tanba polisia ho lider sira ativu rezolve ba kazu sira ne'e.²²

Se maka hala'o polisiamentu komunitária?

Segundu Komandante Jeral PNTL, Komisariu Polisia Afonso de Jesus hatete, filozofia polisiamentu komunitária la refere deit ba departamentu ka seksaun partikular ida iha PNTL, maibe unidade no departamentu sira PNTL no mos komandu distritu sira, hotu-hotu serbisu polisiamentu komunitaria.²³

Nune'e mos PNTL planu estratéjiku halo klaru liu tan filozofia polisiamentu komunitariu katak PNTL nian filozofia polisiamentu komunitária nian aplika ba membru hotu-hotu iha PNTL nian laran. Polisiamentu komunitária la refere deit ba departamentu ka seksaun espesífiku ida iha

²⁰ Membru OPS 30 hasa'e kuiñesementu iha Indonézia. Disponivel iha: <http://www.pntl.tl/2014/11/14/membru-ops-30-hasa-e-koinesementu-iha-indonezia/>. Asesu iha loron 14 fulan Feveiru tinan 2015.

²¹ Tilman, Adelio (2014). Deputy Program Manager HAKOHAK – TAF nian. Entrevista pesoal.

²² Programa polisiamentu komunitaria komesa redus krime. Disponivel iha: <http://www.pntl.tl/2014/08/08/programa-polisiamentu-komunitaria-komesa-reduz-krime-sira/>. Asesu iha loron 10 fulan Feveiru tinan 2015.

²³ Intervensaun Sigundu Komandante Jeral PNTL, Komisariu Polisia Afonso de Jesus iha enkontru ho parseiru dezenvolvimentu TLCPP no TAF iha Sekretariadu Estado Siguransa – SES iha tinan 2014.



PNTL, maibe refere ba aproximasaun ne'ebé iha ba polísia nia serbisu iha instituisaun nia laran no entre PNTL no comunidade.²⁴

Relatoriu *survey* TAF tinan 2013 nian hatudu katak maioria ofisiál PNTL sira (89%) deklara katak sira hatene di'ak ho konseitu polisiamentu komunitária, respondente Polísia 44% de'it (aumentu ida husi 2008) maka hatán simu ona treinamentu espesiál balun kona-bá polisiamentu komunitária. Enkuantu 81% husi respondente polísia sira maka reklama katak sira aplika "prinsípiu sira polisiamentu komunitária nian" iha área sira ne'ebe sira serbisu ba, persentajen ne'e tun husi 93% iha 2008. Dadus ne'e sujere katak maski iha aumentu iha nível treinamentu kona-ba polisiamentu komunitária, maibe laiha klareza kona-bá oinsa atu aplika prinsípiu sira ne'e iha atusaun.²⁵

Relatoriu TAF mos hato'o katak públiku en-gerál nia espresaun konfiánsa ne'ebé iha nafatin ba PNTL bele interpreta nu'udar evidénsia husi relasaun polísia-komunidade ne'ebé forte no públiku-nia aprovasaun ba atendimentu sira ne'ebé PNTL fórnese. Maski nuune'e, rezultadu levantamentu ne'e nian hamosu razaun barak hodi fó pauza antes halo konkluzau hirak ne'e. Maski kuaze ofisiál PNTL hotu-hotu ne'ebé hetan entrevista deklara katak sira komprende konseitu polisiamentu komunitáriu ne'e. Tuir observasaun, bele haree katak iha dezkonexaun iha prátika. Menus husi metade númeru respondente polísia sira ne'ebé simu tiha ona treinamentu espesiál iha polisiamentu komunitária ne'e hatán katak sira aplika prinsípiu sira polisiamentu komunitária nian iha área ne'ebé sira serbisu ba.²⁶

To'o agora, estratejia PNTL nian maka atu kria orden públika (nu'udar ezemplu, resposta), maibé instituisaun ne'e iha kapasidade operasaun ne'ebé uitoan deit hodi kontribui ba halo prevensaun. Wainhira PNTL hakbesik liu ba comunidade sira no wainhira comunidade sira nia eziyénsia ba identifikaun problema no prevensaun krime aumenta, PNTL sei prezisa dezenvolve estrutura ne'ebé enkoraja envolvimentu comunidade molok konflitu sira mosu la'os deit hodi responde ba krime sira ne'ebé akontese tiha ona- se sira hakarak atu mantein apoiu públiku ne'ebé aas nafatin ba sira.²⁷

Iha konversa sira ne'ebé FM halo ho elementu sira iha PNTL nia laran. Ho presepsaun seluk katak polisiamentu komunitaria elementu sira ne'ebé kolokadu iha Departamentu Polisiamentu Komunitaria maka halo serbisu polisiamentu komunitaria. Elementu sira iha Unidade Especial Polisia (UEP) nian hato'o katak ami nia especializasaun maka atusaun sira ba situasaun ne'ebé nesesariu duni uzu forsa nian hodi restaura hikas ordem públiku.

Atu konfirma presepsaun sira iha leten, FM mos ko'alia direta ho elementu sira iha Sub-Unidade sira iha UEP nia laran. Exemplu, elementu ida iha Batallaun Ordem Públiku (BOP) hato'o katak

²⁴ Intervensaun Sigundu Komandante Jeral PNTL, Komisariu Polisia Afonso de Jesus iha enkontru ho parseiru dezenvolvimentu TLCPP no TAF iha Sekretariadu Estadu Siguransa – SES iha tinan 2014.

²⁵ Chinn, Liam no Silas Everett, Silas (2008). The Asia Foundation, PESKIZA KONA BA PERCEPSAUN POLISIA-COMMUNIDADE: Timor-Leste.

²⁶ The Asia Foundation. Survey 2013 Iha Timor-Leste Kona-bá Asuntu Seguransa no Polítika. Pajina 6.

²⁷ The Asia Foundation. Survey 2013 Iha Timor-Leste Kona-bá Asuntu Seguransa no Polítika. Pajina 6.



ami nia formasau intensifika liu iha atuasaun ba perturbasaun ordem públiku nian. Ho nune'e, polisiamentu komuniataria hala'o deit husi elementu ne'ebé kolokadu iha polisia komunitaria.

Nune'e mos elementu sira husi *Task Force* hato'o presepsaun ne'ebé hanesan. Polisiamentu komunitaria hala'o deit husi elementu sira iha Departamentu Polisia Komunitaria. Ironiku liu tan, ho presepsaun seluk katak aprosimasaun polisiamentu komunitaria hanesan hamaus krime no fo fatin ba ema kontinua halo krime. Tanba ne'e presiza aprosimasaun ida rigorozu hodi atua kualker situasaun ne'ebé perturbe ordem públiku.

Maske klaru iha polítika no lei maibe nia implementasaun seidak hatuur diak, iha pratika sira atuasaun PNTL nian ne'ebé lolos tenki ho aprosimasaun komunitária nian. Dala balu hatudu la iha konsistensia entre treinamentu no pratika iha terenu. Iha diferensia presepsaun iha unidade sira iha PNTL nia laran kona-bá atuasaun iha comunidade.²⁸

Kauza balu tanba la iha orientasaun rigor ida kona-bá uniformidade iha vizaun no atuasaun, entaun membru PNTL sira aplika tuir deit formasaun espesialidade sira ne'ebé sira hetan. Polisia *Task Force* sira defende katak uza atuasaun ho forsa tanba sira hetan treinamentu espesialidade maka hodi asegura ordem públiku nian. Laiha formasaun kontinuasaun no loron-loron sira hein deit, wainhira sira hetan kontaktu ruma kona-bá problema maka tun halo atuasaun.²⁹

Fundasaun Mahein (FM) nia monitorizasaun ba seitor siguransa detekta katak PNTL kontinua infrenta problema disiplina no profesionalismu wainhira halo atuasaun iha comunidade. Ezemplu kazu sira iha tinan 2014 nian hanesan, kazu elementu PNTL inisial JS hamutuk ho nia kolega sira husi Unidade Espesial Polisia (UEP), sub-unidade Batallaun Ordem Publiku (BOP) baku joven Bosco Lobato to'o grave.³⁰ Inklui kazu sira seluk ne'ebé durante periodu operasaun boot sira iha ezekusaun rezolusaun Governu no Parlamentu Nasional nian hasoru grupu ilegal sira. Membru PNTL sira la hatudu karateristika PNTL nian ho aprosimasaun polisiamentu komunitária. Iha ne'ebé hamosu preokupasaun no públiku kestiona maka'as kona-bá disiplina no profesionalismu PNTL nian.³¹ Portantu hahalok membru PNTL kontinua halo problema tanba menus formasaun la'os formasaun ba fiziku maibe formasaun ba mental no disiplina ne'ebé importante. Nune'e Polisia tenki sai belun diak ba comunidade la'os sai fali inimigu ba comunidade.³² Ho kazu sira ne'e hatudu hahalok elementu PNTL sira susar atu kore-an husi hahalok indisiplina hodi viola lei no regra insitiuisaun nian.

²⁸ Luis de Oliveira, José (2015). Entrevista Pesoal

²⁹ FM nian konversasaun informal ho estajiaru PNTL ida iha unidade Task Force iha tinan 2013.

³⁰ Membru BOP Baku Bosco Lobato To'o Grave "Armando: "Membru PNTL Ne'e Komete Ona Krime" disponivel iha <http://www.jndiario.com/2014/05/08/membru-bop-baku-bosco-lobato-too-gravida-armando-membru-pntl-nee-komete-ona-krime/>. Asesu iha loron 13 fulan Feveireu tinan 2015.

³¹ Fundasaun Mahein (2014). Operasaun Habelun Reitegra ka Ameasa? Disponivel iha: http://www.fundasaunmahein.org/wpcontent/uploads/2014/06/MNL_Nu.80_26062014_Operasaunpdf1.pdf f. Asesu iha loron 14 fulan Feveireu tinan 2015

³² Jornal Diari Online (2014). Kazu Membru BOB Baku Bosco Lobato, Komandu PNTL Presiza Aplika Pena. Disponivel iha: <http://www.jndiario.com/2014/05/09/kazu-membru-bob-baku-bosco-lobato-komandu-pntl-presiza-aplika-pena-penal/>. Asesu iha loron 14 fulan Feveireu tinan 2015.



Rekomendasaun

1. Rekomenda ba CFP halo koordenaun ho Departamentu Polisiamentu Komunitária Nasional no ajente prinsipal Estadu nian hodi hakle'an liu tan formasaun polisiamentu komunitaria ba elementu hotu-hotu PNTL inklui kuadru legal nasional sira seluk.
2. Rekomenda ba CFP halo avaliaun formasaun hodi hala'o retreinamentu ba PNTL sira espesifikamente ba unidade no departementu sira ne'ebé orienta ba filozofia PNTL nian.



Bibliografia

- Ajente rekruta foun 260 hahú tuir formasaun. Disponivel iha: <http://www.pntl.tl/2015/01/19/ajente-rekruta-foun-260-hahu-tuir-formasaun/>. Asesu iha loron 17 fulan Feveireu tinan 2015.
- Chinn, Liam no Silas Everett, Silas (2008). The Asia Foundation, PESKIZA KONA BA PERCEPSAUN POLISIA-COMMUNIDADE: Timor-Leste.
- Dekretu -Lei n. ° 09/2009, Loron 18 fulan Feveireu. LEI ORGANIKA POLÍCIA NASIONÁL TIMOR-LESTE (PNTL).
- Fundasaun Mahein (2014). Operasaun Habelun Reitegra ka Ameasa? Disponivel iha: http://www.fundasaunmahein.org/wpcontent/uploads/2014/06/MNL_Nu.80_26062014_Operasaunpdf1.pdf. Asesu iha loron 14 fulan Feveireu tinan 2015.
- Fundasaun Mahein (2010) Rekrutamentu ba PNTL: Dalan Naruk ba Profesionalizmu. Disponivel iha: <http://www.fundasaunmahein.org/2010/12/14/mahein-nia-lian-no-14-komunikadu-da-imprenzarekrutamentu-ba-pntl-dalan-naruk-ba-profesionalizmu/>. Asesu iha loron 12 fulan Feveireu tinan 2015.
- Intervensaun Sigundu Komandante Jeral PNTL, Komisariu Polisia Afonso de Jesus iha enkontru ho parseiru dezenvolvimentu TLCPP no TAF iha Sekretariadu Estadu Siguransa – SES iha tinan 2014.
- Lao Hamutuk Bulletin Volume 4, No. 2. : Maiu 2003.
- Luis de Oliveira, José. (2015 . Feveireu). Entrevista Pesoal.
- Magno Ximens, Valerio (2014). Diretúr Nasional Direitus Umanus PDHJ. Intevista pesoal.
- Membriu OPS 442 tuir treinamentu avansadu. Disponivel iha: <http://www.pntl.tl/2014/09/15/membriu-ops-442-tuir-treinamentu-avansadu/>. Asesu iha loron 10 fulan Feveireu tinan 2015.
- Membriu OPS 30 hasa'e koñesementu iha Indonézia. Disponivel iha: <http://www.pntl.tl/2014/11/14/membriu-ops-30-hasa-e-koinesementu-iha-indonezia/>. Asesu iha loron 14 fulan Feveireu tinan 2015.
- Membriu BOP Baku Bosco Lobato To'o Grave "Armando: "Membriu PNTL Ne'e Komete Ona Krime" disponivel iha <http://www.indiario.com/2014/05/08/membriu-bop-baku-bosco-lobato-too-gravida-armando-membriu-pntl-nee-komete-ona-krime/>. Asesu iha loron 13 fulan Feveireu tinan 2015.
- Planu Estratejiku PNTL tinan 2014 – 2018.



Polisia foun tenki tuir treinamentu fiziku. Diponivel iha:
<http://www.thediliweekly.com/tl/noticias/seguransadefeza/1144-polisia-foun-tenke-tuir-treinamentu-fiziku>. Asesu iha loron 20 fulan Janeiru tinan 2015.

Programa polisiamentu komunitaria komesa redus krime. Disponivel iha:
<http://www.pntl.tl/2014/08/08/programa-polisiamentu-komunitaria-komesa-redus-krime-sira/>. Asesu iha loron 10 fulan Feveireu tinan 2015.

Relatoriu TAF (2014), Institucionaliza Polisiamentu Komunitária iha Timor-Leste.

Ribeiro, Boavida Superintendente Asistente. (2014) Komandante Departamentu Polisia Komunitaria Nasional. Entrevista pesoal.

Tilman, Adelio (2014). Deputy Program Manager HAKOHAK – TAF nian. Entrevista pesoal.

The Asia Foundation. Survey 2013 Iha Timor-Leste Kona-bá Asuntu Seguransa no Política.